

摛藻堂四庫全書薈要

集部

欽定四庫全書薈要卷一萬六千七百三十九

集部

家藏集卷十

明 吳寬 撰

詩五十五首

壬寅正旦侍班

爐烟如霧藹彤墀半啓金門複道危咫星辰華蓋轉
中間日月袞衣垂普天鳳歷開寅歲平旦雞人報卯時
御座不勝袍笏近侍臣偏識漢朝儀

和傅曰川以病止酒次陶韻

古來曠達人有酒誰肯止忘憂惟藉茲況在疢疾裏此
事陶翁然豈意至吾子不知翁作詩聊以詩自喜使當
呻吟時得酒蹶然起所以謂濁醪其中有妙理匪獨貌
二豪既醉且忘已美酒與惡石去病殆均矣但嫌過飲
人拍浮渺無涘會將二齒陳稽首致禋祀

再和

閒居發深思欲止無所止幸哉此頑軀不落詩酒裏止
詩昔李侯止酒今傳子而我處其間漠然無慍喜所止

誰尼之旋踵興復起不如不止人二事能料理古人尚
少真俯仰孰知已緘書報陶翁我止乃真矣春服不待
成駕言玉河涘未下孟郊拜豈曰杜康祀

分題百步洪送顧工部

長河勢屈曲學海遙之東瞬息瀉千里滔滔若無窮忽
然經彭城怒發何其雄千艘相上下往往驚篙工昔聞
入蜀險殆與三峽同行人舉足計聊號百步洪此地山
繞路微禹安能通鑿石尚磊磊急流為磨礲噴射聲愈

振石腹疑中空嘗登戲馬臺憶羽能戰攻自誇重瞳子

不數隆準公長驅八千人氣撼沛與豐餘威付此水叱

咤猶生風美哉河渠使來往殊匆匆水利歸上國期成

疏濬功月夜披羽衣清嘯黃樓中下視瓠子河枉築宣

防宮

送汝行敏

共挹清風坐竹林吳門相見到於今久閒池上揮毫手
未怯天邊倚劒心考績最高諧士論分司多暇註官箴

馬頭送別還長嘯不減孫登鸞鳳音

園居初成次韻李賓之見過

叩門遙過我夏日更勞公小屋聊方就清尊幸不空畦
長連古井樹老映疎櫳歸騎休催整追涼勝晚風

觀製雨簷

作軒未料宛丘長簷下增修近石良坐倚前楹天忽遠
步當平砌午偏涼白雲就宿看逾穩急雨來催信不妨
敢與蘓家論擇勝半間難遣十夫將

題浦氏兄弟中秋賞月圖

月臨嘉樹不成眠夜半中庭忽短筵率爾杯盤聊草草
閑然簫鼓却闌闰苟陳星象空相應王謝風流亦可傳
玉季丹青兼有引盡將秋興落華箋

和胡彥超過園居

三畝幽棲地新詩枉孟郊高題無鳳字拙構有鳩巢委
卷重勞問衡門也用敲一尊聊奉款親手破霜匏

次韻陸鼎儀過園居

開門小圃思悠然
敢與陶翁較地偏
此日便教懸木榻
誰家却去坐瓊筵
藜羹韭餅真能具
菊本瓜苗早已捲
徒步相過應莫厭
只愁東郭履先穿

和王允達病中雜述

日午畏新暑步就疎槐陰
清風颯然至當此一披襟閒
居任寥落而獨懷同心入
夏阻良覩荒園變鳴禽懷哉
久在告幸無官事侵口吐陶韋句時將代呻吟向晚有
奇事忽此金石音平生在學道富貴安能淫青巖舊隱

居興入烟嵐深微詞寫雅趣展玩良足欽凌嶒聳詩骨
悵望西山岑

分韻得肅字送林朝信

十年載法冠能使百寮肅共瞻風裁高鶴班聳孤鵠平
生獻替心奏草惟自讀聖皇記老成昨喜批薦牘議從
吏曹公初豈假夢卜輶君副臬司萬里騁遐躅童服增
煌煌金鎊映朱襍雅志在澄清姦邪首仍觸昔聞走豺
狼今見蟄蛇蝮團團八桂林得此一枝足薰風吹雙旌

欲渡江水綠餞別雜交親天氣適炎燠酒闌碁梨喧醉
墨已盈軸羨君有茲行畫錦非所欲實惟家慶全樂哉
難具錄

為王希曆題啓南長蕩圖

吳綾八尺餘遠勝好東絹坐移長蕩來歛向眼中見按
圖想舊游巒嶺非生面陽山踞獨尊虎阜奔而殿柔櫓
一搖搖船頭翠痕轉春水澹若空白雲故多變佳哉吳
中景獨許沈郎擅典客方壯年孰云宦途倦吾志每圖

南欲趁秋風便幽深付一筇此樂人勿羨

次韻答同年邵汝學約過園居

觸熟相過敢憚煩會教童子埽蓬門俗流未許通車馬
年契長期到子孫已擬置墓刊木局旋教開酒擊泥尊
荒園半畝清風足他日應消楚客魂

二答李士英

堂成巧者更相煩咫尺牆東別置門長願清風分故舊

獨尋芳草憶王孫

士英出唐宗室後

楚人豫約空詩帖吳客難

言乏酒尊荒逕寂寥春去遠倚闌還用弔花魂

三答劉道亨

坐待劉義洗熱煩雪車冰柱早臨門自憐學圃空稱老
誰似登堂累抱孫杜子刈葵蔬入饌陶翁收秫酒盈尊
奕場莫漫誇能事高著還當惱醉魂

四答胡彥超

園丁頻遣愧勞煩菜龍清陰已滿門車過陳平多長者
官如胡質有諸孫小堂定擬虛中席內府初停給上尊

翰林每歲五月至
九月例不給酒

不怪連朝風雨惡暑天真為洗詩魂

五答李賓之

庵居聯詠舊曾煩詩令嚴來豈棘門欲繫苦匏同賤子

李有詩云庵居如可借吾亦繫吾匏每誇仙李得賢孫過街莫放追風驃

李嘗墜馬對影須開問月尊不是葛洪川畔路李源休負舊

精魂

六答楊應寧

池上揮毫思不煩忽傳詩句到柴門官聯賈至稱中舍

字許楊修識外孫西郭向人空折簡東堂延客已開尊
杏園舊例推年少風雨孤村莫斷魂

對萱花

萱花映叢竹顏色殊覺佳新雨濕還重薰風吹復斜不
嫌開易落一日仍一花歲晚竹當茂無令人獨嗟

送仲山後坐通法寺西軒

是日名其圃曰雷泉

歇馬東城下緣堤踏淺沙長因送客日數得到僧家灌
木陰三畝奔泉響萬車晚來簷溜斷天際散紅霞

送郭翔鵬進士知福寧州兼寄州倅馬庭簡

閩海遙遙獨置州忽看秋水動扁舟暫為魏闕三年別

定向吳門十日留

其兄為蘓學教授

甲榜尚稱新進士雙旌已

作古諸侯公餘獨恨詩筒少為謝同官馬少游

園中晚步戲作

晚涼散步清陰下一樹古槐當廣廈畦間雨過井水渾
牆上煙凝日光赭病來一月不朝參名姓在朝身在野
要知未許吾獨閒舍有閒僮廄閒馬城中塵霧漲天高

披襟誰是同游者果然此日是匏翁昨種苦瓜今可把

題顧定之墨竹追次虞邵菴韻

蔣洪勲藏

林間春雨過亭午葉初乾如與幽人對翛然貌獨寒傳
神者為誰顧老從後起不及湖州文猶勝蔚邱李

畫鳳

鳳鳥久不至曾致宣尼悲獲麟尚被殺不至亦其宜去
周二千載見者今為誰徒從書傳中強爾分雄雌畫工
五色筆點染毛羽奇不須舞簫韶展圖即來儀高岡豈

岐山獨立迎朝曦
噭噭更喈喈
又即卷阿詩
遂令後世人如生舜文時
我欲走四方
按圖往求之
膠東與北海
恐有漢鶴遺
不如求之人
徐庶或在茲
百年方承平鳳
德宜未衰
寄語楚狂輩
高歌獨何為

送沈晉州林美

賢名曾是故鄉聞
壯歲高科靜不羣
坐上誰為黃叔度
榜中吾愛沈休文
鞭蒲此去猶無用
符竹從來豈易分
吏散午衙公事簡
定將書吏對爐薰

秋日曝書偶閱韋蘓州集

白日落未盡竹陰滿前除翛然暑氣退高簷當雨餘新
松無悴色萱花亦已舒偶觀草木性中懷一欣如脫帽
被粗葛庭際方收書愛此韋郎句把誦意踟蹰焚香更
埽地適喜中堂虛累月猶在告深慚此閒居

送僧永岡歸吳住白馬寺

石縫梅泉一縷清早年依此學無生紫藤垂塢人迂步
白馬駄經寺得名法席坐揮梭拂短官河去上木杯輕

山中試茗何時好擬借禪房折脚鐺

送丁鳳儀

解裝適新秋浹旬指堪數俗事各匆匆雅客未重覩愛君產南都樹立弃衆取高情薄雲霄清氣填肺腑嘗聞策蹇驢徑詣大江滻天寒無一事獨看雪花舞維此一段奇晉人可為伍信爾趣尚高佳句隨口吐作官不出鄉且幸居北部往來湖山間吟興不曾忤舊臺悲鳳凰遠州擬鸚鵡所至必留題錦囊有詩譜此來非好遊聊

復較官簿客去大不堪昧目滿塵土掉頭條言旋頗類
孔巢父水路涼思多船窓靜揮塵何處落孤帆夕陽帶
疎雨

送林充給事使暹羅

鳳詔初從閣下裁仙郎遙向極南開林回早棄千金璧
陸賈方施萬里才滄海雲帆知幾轉島夷卉服定偕來
已判天闕三年別還待星槎八月回

赴李世賢賞月

岸幘披襟素影中施牀列坐短牆東月宮桂樹依然在

人面桃花已不同

去歲此會有蕭漢文

卷陌曲當塵坌遠酒杯涼

沁露華濃夜深忽作掀髯笑猶喜論文興未窮

雨中與李貞伯沈尚倫諸友過隆福寺

步來禪榻畔涼氣過團蒲竹雨簷前亂茶煙林下孤乘
閒攜畫卷習靜對香爐到此忽終日浮生一事無

僧舍對竹

老禪趺坐處疎竹翠泠泠秀色分隣舍清陰覆佛經蕭

蕭日暮雨曳履繞方庭

張來儀楚江清曉圖

江州失守遺空宅避難來為吳地客當年北郭擅才名
若比唐人是張籍社中四傑知為誰楊炯徐陵暨高適
感時撫事相倡和歲久家家有詩冊吳地非無祿可干
直氣填胸羞枉尺筆端獎借意何深試與七姬題墓石
幸逢世道輯干戈山谷遺民總徵辟自信容臺不負丞
初行重典難逃責炎荒不及江流清懷沙賦就鬚如戟

傷哉社友誰復存雪上孤墳少松栢蒲陽朱君遊宦來
得此橫圖殊愛惜登堂示我實失驚展卷茫然為離席
此老能詩夙所知丹青豈料居高格米狂餘事已盡傳
王宰何人敢相迫墨痕流動淡且濃紙上班斑皆手蹟
日光雲氣蕩欲開最愛層層楚山碧竹窗疎雨助新涼
坐我扁舟沿七澤更將八詠當棹歌直下龍江醉仙魄

畫中每段有
詩凡八首

諸友賀予新堂有聯句數首楊惟立以疾不赴

他日徧和其韻因取末首和而酬之

任渠府謁更臺參曉起微吟帶宿酣尚憶小堂虛左席
忽傳新墨滿方角連篇且為從頭數隔巻真如對面談
後夜只留滄海月待將餘興付東菴

謝李貞伯送瓦茶爐

搏埴功成上短筵茶香酒煖盡相便送來陶鼎風斯下
移近寒屏火始然巧匠刻銘依古制才人聯詠費新篇
却憐吳地官窑徧深幸遺才出萬軀

送傅曰會中書告病南還新喻

錫宴瓊林識醉顏盛年文采映朝班並遊鳳沼鸞坡上
總在金昆玉季間楚產向來非北學漢官初許暫南還
詩囊藥裹行裝滿秋興先歸閻阜山

與李士英過王鴻臚鄧村別墅看菊午憩洪恩寺二首

步入南園亂菊叢霜餘籬落淡秋容朝衣欲解寒香細
醉眼頻揩秀色重李愿他年須共隱王弘此地正相逢

誰誇九日龍山會千古風流接舊蹤

城南韋曲路非遙遊客逢秋不待招已過菜畦還柳市
不勞月夕更花朝鄰僧乍許分禪榻田父那嫌借酒瓢
萬木號風平野闊晚來欹枕聽江潮

原已宅賞菊

休從雲外望天香誰似蕭然林下粧嫩蕊漸成黃面老
低枝猶比白衣長曾隨枸杞添風味却笑芙蓉住水鄉
詩社清忙今又動看花直擬過重陽

送邵文敬知恩南

萬里南行秋氣深却因留別費清吟書家已擅臨邑穎手

仕路俱懷易播心折桂石城曾作伴

文敬與予同鄉舉

種椒淮

浦定成林

文敬分司淮南時嘗種椒百株

名南家世應無忝詩裏甘棠

舊有陰

九日諸友過園居小飲

久拚秋盡有清忙籬下依然萬點黃休說滿城風送雨
端愁今夜露為霜飯隨鄉俗駝蹄短研入詩筵鳳味長

願得他年身共健故山歸去醉重陽

次韻酬蕭文明

尺書遙向天南寄秋曉臨窓病眼昏把袂尚懷前日別
開緘如對故人言風高白雁聯羣過霜後青松壯節存
莫便遐方為久計賜環終許荷殊恩

次韻李賓之觀懷素自叙帖真蹟

法書莫辨贗與真真者一見餘風神吾生苦不解鑒賞
猶道此卷超凡塵少時曾觀聖母帖片石錯比荆山珍

風神已乏祇骨骼邈然陸地望天津囊無黃金可懸購
自笑微生常乞隣此卷五年凡兩閱手撫禿翁心轉親
向來作書總孟浪盡弃舊學從新春棗函藏弃人莫識
李侯知得嗟何因昨來借觀坐展玩始識半面俄全身
長廊豁氣或狂怒細墨垂絲兼笑顰禿翁早受佛氏戒
不貪尚帶癡仍嗔觀書得詩吾獲利室有雙璧非全貧
臨摸咄咄付能者舊例乞隣緣與人

次韻李士英劉道亨過園居看菊二首

詩人渾不厭貧家閒就荒園看菊花傾倒臘醅瓶未罄
品題秋色向爭嘉殘英抱節真霜傑本草言功有日華
醉後却勞歸騎晚西風烏帽數枝斜

天寒牆下見枯桑叢菊朝來未減黃小卷幸違東市遠
疎籬能受北風涼肯因過客開門嬾嬾有呼童洗盞忙
日暮掇英衣袖滿紙屏低擁慢焚香

次韻顏澄之留別

朔風吹面到燕南喜報天街駐兩驂江水長懷曾共飲

京塵初拂便交談作官地偶分南北考績名宜壓二三
歲暮旌門人獨倚過家須着綵衣參

題台人鍾希哲寫文宗儒小像

羸馬空囊貌不寒吏曹重署博平官他年若赴天書召
此幅須留父老看

次韻陳粹之鴛湖寓居

北來湖上借幽居坐占鴛梁作嬾漁未許扣門傳隱訣
暫忘燒燭治官書一塵故里為謀易百畝他年不願餘

花柳滿村初病起門生誰惜送籃輿

雪中李世賢招觀東坡清虛堂詩真蹟次韻

茫茫巨海流銀沙光分民舍并官衙
詩人說詩等說法四座續紛天雨花寥寥
小巷絕人跡誰肯拄杖過吾家曲中合沓失朱鷺
谷口聯翩多白鴉青葱搖落上林苑
一夜亂綴瓊瑤葩故人相送定石炭惡客好飲惟江茶
清晨忽報有蘯墨折簡邀看門頻撾形疑蝦蟆似曾壓
技癢蟻虱誰為爬料知刻本來廣右醉筆漫滅猶堪嗟

坐當大雪發長笑新酒正熟浮紅霞

是日往觀果刻本蓋世賢招飲恐客不至故給

爾乃復次韻

出門騎馬踏雪沙玉堂吏散成空衙何人手剪吳江水
而我目眩梁園花客居長至嘆寂寞賴有東隣仙李家
試開泥尊香潑蟻却笑石本光翻鴉清虛堂中事已往
妙墨零落隨風葩空腸啖盡元脩菜渴吻煎徹庭堅茶
詩成一紙來萬里峒石至今椎密搗濃書鐵把純綿裏

深刻解上潮泥爬似人可喜非浪語與客爭觀還共嗟
莫言此幅字漫滅夜久屋壁飛晴霞

明日世賢持啓南雪嶺圖索題復次韻

小徑升堂新築沙退朝無事還私衙誰移雪嶺入我屋
老眼白日疑昏花坐游未覺足力倦倏過野店仍山家
淺溪舟膠集凍鴨空谷屢響翔飢鴉狂風入林一攬動
零落玉蕊兼珠葩此時誰埽林下白急欲往煮僧房茶
忽然仰面見高寺扣戶還須持馬過長安十年走薄宦

對此似將塵土爬西湖尋僧天欲雪蘓子故事令人嗟
清虛舊韻更可借捧硯獨無王子霞

為歸貢士題其先曾大父素節翁遺訓後

歸君入我戶手中何所持自云曾大父晚歲有訓詞讀
之心凜凜宛與生同時時當洪武初立法張綱維翁也
長鄉賦死者皆等夷避禍行萬里躋險兼履危一身孰
為伴妻妾負兩兒或犯盜賊狼或當狼虎飢道中屢脫
死若有神所司艱苦歷三閏恩宥溥見施終然穩渡江

龜卜不我欺本無處世意乃有還鄉期痛定如憇父甘
回忽含飴享年數近百孫曾弄而嬉扶杖登春臺世道
仍熙熙始知百年內苦樂真相資細書示後人微意當
知之吾聞崑人語此翁德惟滋所以少坎軒福履綏期
頤餘澤久不竭仕宦方自茲為善必獲報翁也安能私
令人處平世逸居可無為

懷寧二孝子

珍禽或同穴佳木或連理蕞爾懷寧城乃有二孝子一

邑一人孝已多一家二人當如何母存共作堂上戲母死誰敢臨喪歌有母斯有子事死如事生兄孝難為弟孝難為兄有司不須問隣里試看墓上湧出泉一泓又有紫芝燐燐廿一莖山川發祥非徇俗朝廷旌表始稱情欲知孝子姓與名吳氏本源與本清

偶見元李希蘧提舉遺墨乞歸賓之蓋希蘧其先世也因賓之作海月菴記為謝以此酬之

遺墨持歸走僮僕想見開緘重薰沐百年珠玉慨沉埋

袖拂蛛絲光奪目遂令短紙一尺餘價壓書巢三萬軸
乞隣與人真自慙藝苑酬功百言足夜歸解帶不成眠
海月亭亭當矮屋琅然烏鵲忽驚飛月下新篇已堪讀
湖湘文種傳一家前有希蘧後懷麓吳人再結文章緣
凡上分明留此幅錦囊收貯莫教遲俗子無知將手觸
後世諸孫更好文還向吳人獲珠玉

家藏集卷十

欽定四庫全書

會要卷一萬六千七百四十

集部

家藏集卷十一

明 吳寬 撰

詩五十八首

送吳令濟赴邵武推官

元師道之後蘭谿人

闕下相逢歎久踈交游已是十年餘科場獨使名終抑
啓事誰將例復拘上郡官寮持仕牒故家孫子抱遺書
越舲搖動春風急此樂何如過里閭

為李貞伯題朱寅仲小畫

春半扁舟過太湖洞庭着雨翠模糊惟應舊日同游者
愛此朱郎水墨圖

和陳粹之元宵五詠

鬪鷄燈

坐上初看吐綬紅夜深童子忽聞籠羽爭訝分明處
烽火都歸踴躍中旬到孟韓猶覺晦力如劉項漫爭雄
獨持一炬當蹲俎輸與朱翁善折衝

走馬燈

鐵騎交馳映落暉長戈應藉魯陽揮真成烽火連三月
早築金城已四圍矢石聲沉堅莫破旌旗影轉疾如飛
伯仁一炬非相戲信落兵家第二機

火花

細蕊紛紛頃刻開坐觀火候亦奇哉春回玉琯微微動
風定金沙颯颯來桂子忽從天上落蓮花誰向水中栽
夜庭一霎聊供笑客休將見跋猜

粉丸

淨淘細碾玉霏霏萬顆完成素手稀鬚上輕圓真易拂
腹中磊砢便堪圍不勞劉裕呼方旋若使陳平食更肥
既飽有人頻放唾席間往往落珠璣

油餌

膩滑津津色未乾聊因佳節助杯盤畫圖莫使依寒具
書信何勞送月團曾見范公登雜記獨逢吳客勸加餐
當筵一嚼誇甘美老大無成憶膽丸

送袁德純知宜興

此日公車儻薦賢更教遺愛與人傳郵程却算三千里
科甲還驚十二年吳邑煙花曾有約荆溪山水亦前緣
丈夫事業今方始莫學蘓公便買田

送王允達

羣居恒紛紛取友惟犖犖彼無志操徒處世甘齷齪富貴謂可求奔趨冀超擢孰能脫卑汙特立等山嶽王子有高趣小節乃儉樸當初入官時世事已先覺求間計已違欲去意中確上章乞養疴堅卧從勘駁得請即挽

車不顧雪泥濁故山啓巖扉絕澗聆水樂閉戶還著書
吾事在家學蹇予忝末契久矣藉磨琢相過雖不疎相
別亦已數累日獨惆然念此歲月邈隨行誰我留所愧
聖恩渥終當躅遐蹤別手不重握

送允達後飲通法寺西軒

杯酒頻將別恨澆日斜酒盡却無聊獨嫌去客忙騎馬
更欲尋僧懶度橋小圃杏花春尚淺長溝流水意俱遙
年華似與人相約牆外鞦韆映柳條

陸職方宅宴集分得鶯字韻

良會未云已不計杯酒行杯酒非所重重此鄉里情退
朝入公所職務各有榮歲首幸休暇於焉盡平生諧談
接羣彥參坐從名卿衣冠既相合壺矢亦無爭今日更
樂甚獻酬滿前楹東皇況解事助以積雪清向夕却燈
燭尊罍晃然明主人出新語四座意俱傾失羣慨歸鴻
求友懷遷鶯未畢終日興更申來歲盟

清明日林亨大邀游興隆寺飯聰老房聰出永

樂初姚榮公與梁用行輩亦以是日游城南倡
和四絕句見示為次韻

柳下行來過佛樓旋攜越酒薦閨羞香車盡日如流水
總向長安陌上游

傍井循牆踏細塵椿芽蘭葉一時新杜陵亦是尋詩者
隔水空憐見麗人

詩卷曾留白下城北來燕地又清明憑誰更和襄陽曲
七十餘年共此情

園幕擁矢各分明繡佛垂堂晚獨登社裏廬山隨處有
遠公今日是詩僧

原已玉汝栗夫過園居分韻得畫字

散吏如野人園居幸麤就旋乞桃李栽疎籬幾枝透莫
嫌花蘚稀倚樹已堪嗅入夏倘成陰還來坐清畫

予初登進士第時武靖侯趙公實奉詔待宴禮

部公既老病家居念舊為四絕句見寄次韻答

之

甲榜題名愧起家賜來法酒勝官茶元戎傳詔懷當日

許戴瓊林第一花

散吏蕭然自一家渴心常愛玉川茶曲江院裏重回首
翠幙春風隔杏花

連雲甲第列侯家坐上曾分舊賜茶充國老來諸子壯
戰袍重見織團花

幕府功高早臥家囊收薏苡不思茶華箋詩到行行整
誰說臨文老眼花

和趙武靖病中招飲二首

瓊林錫宴已多時想見褒公虎豹姿
今日春風過甲第
馬頭飛絮逐游絲

老將閒居不計年舊藏腰帶賜通天
頻婆樹底多詩興
瘦句誰誇賈浪仙

貞伯玉汝原已攜酒同過園居二首

門設荒園盡日開探春時枉故人來盤中自愧無鮭菜
牆下惟誇有鵠槐願得常年供紙墨尚留隙地築亭臺

習家池上山公醉馬背須看倒載回

石庭延客坐斜暉此際殘花亦緩飛新作園官非強授
故衝詩陣忽重圍晚晴霞彩浮高屋春冷風威入袂衣
後日相遇應上已野泉猶可祓除歸

王孟端墨竹為貞伯題二首

九龍山下竹千竿盡屬高人王孟端何處看來渾似此
山堂踈影落漪瀾

百年風致宛如新滿地清陰庇後人金母橋頭重問舍

墨君堂上舊傳神

送錢世恒御史出巡

峩冠誇憲史秉笏侍明廷奉使初乘傳寧親復過庭五
雲違北闕六月息南溟出郭人爭餞臨岐馬不停朱函
藏手敕繡服映腰鞋風送花填路沙隨水接汀才華張
美錦意氣逼青冥萬里前旌動光搖執法星

題趙子固畫蘭

王孫弄筆成墨藪九畹依然連百畝開圖墨瀋將誤拾

撲袖香風不勞艤破縑零落三百年非藉好事安能傳
寸根無土强生活鄭老後來真可憐

分韻得江南二字送貞伯二首

忽對春風南陌還思夜雨西窓高丘恨不千尺望見離
人渡江

渺渺綠波芳草此時送別何堪潮到潯陽向上人歸鍾

阜之南

送貞伯再分韻得舍字

宛然李公垂精悍真可詫譬彼千里駒骨相有定價維
昔掌絲綸朝回屢清暇考古如不及萬卷壓高架危言
動明主雅意資聖化去之十年餘尚復令人怕平生所
交游往往至卿亞形蹟久遺忘氣力豈憑藉名列楊王
前身處季孟下久次仍兵曹分司得車駕金陵佳麗地
古句非假借秦淮匯灞澨鍾阜鬱嵩華況此亦故鄉無
勞買官舍所惜者吾徒臨別當首夏家家競餞飲長日
對尊筆安能叙中情坐語此短夜離懷逐江流千里向

南鴻

題海虞錢氏所藏王均章虞山圖

均章名珪號中陽老人

元盛時年未四十棄官歸隱虞山之下慕丹術尤邃於醫所著有泰定養生主論等書年餘九十而卒見

吳思菴跋

扁舟昆湖去憶向虞山還當時迫日暮未得窮躋攀至今三短章寂寥不重刪安知六載後依然見茲山諒無愚公愚賴有頑仙頑頑仙隱居處深林置柴關丹竈火常伏藥闌苗載芟高情付繡素丹青色斑斑茲山卧平

野隱然不成環逶迤亦甚遠攢蹙何其慳只尺見百里
羣峰互垂鬟飛鳥歸易沒浮雲出偏閒拂水最奇麗空
巖故旋澴天風或稍定石壁仍潺潺仙宮對佛寺妙境
非人寰獨憐仲雍墓誰為翦榛菅短棹載書卷浩歌水
雲間彷彿歸庵翁往來寶嚴灣竊祿本無補乞身亦多
艱卧游畢舊願坐嘯開塵顏

送周仁廣通判福州

青衫烏帽去翩翩劇郡勞人信獨賢地下文襄宜有後

江南凋敝不如前
濟民長策存家傳
游宦初程接祖筵
公道從來能自薦
三山風月漫相延

得賀美之書言吳民被災

書來吳下少浮沈
入手猶疑得好音
泉客美珠俄化血
田家新穀已剜心
附毛却恨皮何在
竭澤安知水不深
肉食詞林無寸補
短吟聊復代官箴

題畫

水長鵝肫蕩口花飛鸞脰湖邊吳歌唱徹歸去日暮青

山滿船

送沈仲律湖廣僉憲

江左才名自一家流傳詩法到京華乍來一月俄成帙
更別三年定滿車赤壁巢危留夜鶴洞庭波遠帶秋霞
遙知使節登臨處訟牒稀時早散衙

曉過工部分司池上觀荷

匹馬城西趁早涼偶來池上見紅粧魚牀近接浮雲影
樹屋高撐漏日光翠柄依然搖白羽碧筒真可當清觴

莫乘輕筏過南渚鷗鷺鷗正滿塘

題厓山大忠祠四首

休指厓山弔戰場忠魂久已過錢塘三仁可少文丞相
一死如前李侍郎毒霧漲天橫冷氣落星浮海散寒芒
孤墳最是無抔土新廟依然有瓣香

覲母誰懷國事憂回看夜壑已無舟山河滿地皆戎馬
潮汐常時自海鮆空使識書符四廣不教宗社復東周
孱兵到此誰非死名姓紛紛惜未收

獨上高丘望大洋晚風吹淚濕衣裳何人忍恥修降表
當日臨危進講章島國全身惟叛相潭州無事却勤王
史家未識留燕意便把祥興繫宋亡

厲階千古恨遼金戮力終成國步侵鼎足一時擰海角
旄頭中夜到天心間關豺虎魂空返寂寞魚龍骨共沈
臣節屢書猶不盡欲將遺事託碑陰

次韻陸鼎儀讀文信公指南集

柴市遺祠凜若生艱危當日仗忠誠衣裁左衽慚相尚

纓結南冠死却榮正氣自勝牢獄困颶風偏使乘輿驚
從容取義真難事淚落陳編此日情

得原輝書云東庄兩桂樹甚茂

兩桂當年汝自栽石庭一別手書開經行已訏枝相礙
愛護應勞土重培密處栟櫚休剪去常時鸕鷀每巢來
香傳隔巷繁花發欲趁秋風買棹回

與諸友出城東散步水際

岸花汀草駐殘春步逐漁郎更問津側足岡巒渾不畏

會心魚鳥自相親一灣已似江南意半日都忘洛下身
西出郭門勞僕馬青山真是誤游人

答雪屋上人

艤舟山足扣禪機記得雲林啓半扉靜夜香爐渾不冷
深秋書札未應稀雪中老屋懷簷葛湖上長鑣負蕨薇
須信大顛詩律細世人休更笑留衣

長至日飲張兼素後府新齋

齋居清絕坐忘還明月從渠照醉顏自署何妨棋品下

相遇不在酒杯間。葭灰微動臺官識。羽檄稀來幕府間。
誰似當時張仲蔚。蒿萊滿地戶常關。

濟之作共月菴有幸分海月菴中月之句因足
成答之

辛分海月菴中月。此事流傳亦甚奇。隔屋絕勝千里共
可庭寧受一方虧。翛然步屩歸深巷。聊復詩筒過短籬。
報我澄波三萬頃。他年應宿太湖湄。

再答

他年應宿太湖渭獨許風流白傅知林屋千間真可住
畫船十隻也須移藏來左券言非戲分過東牆事若癡
後夜不如同醉賞羽觴飛處雨無疑

三答

羽觴飛處雨無疑月過槐梢人去時齊相已忘求楚貢
晉人終肯救秦飢清輝全借渾非少舊好重修幸不遲
願得浮雲長散盡家家簾幕與秋宜

送劉職方時雍赴福建參政

早振詞林五色翰
廿年郎署忽彈冠
校書劉向成新序
判事姚崇起夏官
楚客不驚湖海闊
閩山能隔雪霜寒
他時召伯甘棠樹
只是南風荔子丹

祈雪齋宿

坐久窗間耿玉繩
齋廬人靜黯殘燈
常年樂事心偏向
深夜憂懷力未勝
月色滿庭疑是雪
河流沿岸想無冰
校書劉向今如在
更欲相從論庶徵

次韻倪學士祈雪齋宿

河西畔路如迷雲霧濛濛萬木低三日偶成祈雪會
一篇將擬聚星題香凝斗帳清無寐地接公堂近可躋
夜半攬衣人欲起長廊月白誤寒雞

哀李士英二首

逝矣平生恨獨賢同官今幾是同年詞林有一誰言少
科甲惟三我愧前弱息命名悲反席

士英沒前一日予往視之以其子託

予命衆人談夢悟乘船

士英初病夢入一舟中無限隔本無通明處既沒衆始知其為

棺也安能便作南遷客死別吞聲重黯然

歲暮西街日景收馬頭殘淚憶交游朝班竝立常連肘

仕路爭趨每掉頭經解暫緣持藥廢

士英熟於經學常力疾為諸生講解

孝思猶作治棺謀

衆議治棺士英聞之曰吾先人客死於此因貧歟葬皆不如禮慎無於吾

厚獨蕭條舊舍難重過春到惟應卉木愁

觀盛舜臣所藏竹爐蓋倣惠山元僧之制其伯

父侍郎公銘其傍

聽松菴裏試名泉舊物曾將活火煎載讀銘文何更古
偶觀規制宛如前細筠信爾呈工巧暗浪從渠攬醉眠

絕勝田家盛酒器百年長共子孫全

題畫四首

雲閣青山出松厓翠瀑流悠悠三步外為爾一回頭
漁舟凍不移況有樵斧響占斷楓花灣甘為五湖長
深鴟閟清暉誰知有佳寺惜哉挂帆人只愛江風利
清湍帶平岡誰使入毫素老樹四五株結茅恨遲暮

家藏集卷十一

欽定四庫全書 舊要卷一萬六千七百四十一

集部

家藏集卷十二

明 吳寬 撰

詩四十五首

送馮佩之副使江西提學

天上朝辭玉陛行
杏花開處動雙旌
秋臺高薦皆公議
春榜重懸滿後生
江右儒風當復盛
越中文士莫相輕
長安門外期重見
為報三年學政成

送賀澤民赴河南僉事

御史才名闕下知外臺欲赴類分司豸衣未敝何須改
螭墨當均尚不移南浦吟成芳草色曲江過盡杏花時
諍臣自古闢休戚漢使行將名望之

謝孫希說送長鳴雞

何物襯裯白錦毛庭前解縛便長號徒聞野鶩令人愛
未許蒼蠅代爾勞拔距羣來如赴敵峩冠獨立自分曹
夜深風雨偏安枕餉餽從今謝子教

送賀其厚迎其弟解元其榮喪南歸

臨別匆匆把客裳愛君誰比四明狂只從門外看扶柩
肯信詩中詠闌牆諸子讀書應不廢故人沿路定相將
明朝我更成寥落西館塵生六尺牀

次韻施煥伯下第

禮闈難遣獨離羣老子春來最惜君暫向長途聊弛擔
倘逢知己更論文客樓高卧三竿日禁闈遙瞻五色雲
為語施讐宜少待韋編終不負精勤

觀園翁種菜

園居無所營筋力徒自強惜哉一畝地愧爾三年荒清
晨老圃至鋤治循東牆札札瓦礫除奚顧宿草傷壅土
成數畦遂分界與疆土爰布美種能風要深藏因感昔
人語種植信有方

園翁云深種則耐風此漢趙過語也

日夕度壠行依然

自褰裳流泉俯可挹長溝設隄防所恨天久旱井泥渾
且黃安能足灌溉頃使菜甲長人力已云至天時亦相
妨緣知田野外黃沙正茫茫何如但肉食此勞不須嘗

玉延亭成次韻玉汝

偶栽山藥得佳名牆下幽亭一日成車馬勒回無俗士
壺觴傾倒盡平生升階脫屨長頭近倚檻觀書老眼明
此後來游誰復障繞籬須為惜殘英

又次韻李賓之

靈苗種後亭初築匠石園丁共玉成聊復棲遲稱小隱
不應服食學長生盤中便可少苜蓿階下休誇有決明
欲向楣間乞題字墨雲飛動看英英

次韻諸友玉延亭聯句

樓高未許臥陳登聊結荒亭揖客升坐定園花紅雨斷
望迷宮樹綠雲層牆低漸覺簫聲近杯淺休嫌酒面澄
願得留詩成故事西菴入夜更挑燈

飲玉延亭喜雨

園門新設不曾闕天意能供半日閒凍雨一番驚屋漏
晴虹千丈比橋彎墨翻荷葉詩人句紅綻榴花醉客顏
賴有冷泉娛晚酌籬根流出更潺潺

寄壽陳起東五十

束髮同游不出鄉廿年兩別費相望江山繞郭供詩筆
歲月留人坐講堂紅頰也應誇獨好白鬚休更較誰長
要知久客京華者壽域躋來已雁行

賦園亭四物

甃

楹間設席坐來安橫木旁施當曲闌面面不妨閒徙倚
曉涼踈雨最宜看

竊

槐花暗落雨聲中
簾幕高擰兩翼同
憶泛扁舟過木瀆
青山緣岸正推篷

屏

小紅鍊翠不遮亭
炎日西行藉紙屏
陰雨暫時誰許撒
更多游客要題名

橋

移得詩中丈八溝
雨餘新碧水初浮
晚來客醉高眠處
莫訝孫郎不枕流

送沈尚寶賀千秋節還南京

琅函遙捧望儀宸六月樓船度海津早歲喜逢三日雨
好官閒避十年塵桃花滿種玄都觀柳色重迎瑣闈人
莫歎世情今尚在南歸須為問江神

次韻沈時暘雨後過飲園亭兼懷李貞伯二首

農家苦久旱嗷嗷三伏中異哉暑氣酷宛與炎方同夜
眠聞好雨早起乘涼風吾亭適廳就歡聲助園翁簿書
懷杜老笠屐來蘓公願從康衢民擊壤歌時雍故人五

年別舉杯賀奇逢俯挹澹泉登臺眺危峰天高孤雲落晚晴度冥鴻

四海人亦多吾生交獨寡有時忽仰歎浩氣振屋瓦窮
巷謝逢迎荒園任踈野欲從獨樂翁往赴耆英社長日
無所營新秋更清暇雞黍不滿盤醴酒仍在筭却枉知
友來冒雨獨騎馬因懷西臺李去弔長沙賈封書白門
邊弭節蒼梧下

貞伯官南京以公事出嘗

有書來云直至蒼梧而返

再次韻答時暘飲後見貽二首

散吏幸無事合置荒園中著書忘其詞安復論異同牆
下棗垂實颯然起秋風感時忽搔首五十真衰翁投牒
愧一出束帶隨三公晨趨揖東閣夜夢游南雍鄉使來
吳下入門偶相逢中懷不能語倚壁如頽峰南飛孰可
繫仰見青天鴻

淙淙簷溜垂此事久亦寡移書防漏濕矮屋初墮瓦久
曰雨固好塾溺念郊野況復南樓人百步隔詩社清池
下幽禽坐對共閒暇妙墨尚在函濁醪復盈甞持此欲

就之泥深沒羸馬疎慵幸免朝早謝鳳池賈風低碧篠叢悵望西窓下

喜原輝弟至京

時五月二日

遠道親攜藥裹來當門下馬拂黃埃不驚舊日形容改
猶記前宵夢寐回出巷親朋宜漸訪上牀兒子欲相陪
平生四海尤憐汝得向窓間笑口開

大雨坐海月菴

即看池面水平橋旋覺孤亭勢欲漂老父得魚過別市

誰家移竹趁明朝四陵下馬應難避

時世賢倍
紀山陵

北菴將

書莫見招

玉汝招飲

吾弟遠來能慰我彭城今夜憶逍遙

玉汝以予辭不赴次韻再約來日復和辭之

道上蹄涔接板橋詩筒將去却愁漂縱橫燕市雲為雨
彷彿巫山暮復朝半舫若浮宜自繫尺書乃至故相招
泥深我僕難忘蹤莫使前瞻馬尾遙

玉汝復次韻來速乃許赴再和答之

佳時已過鵠成橋菰米榆錢忽亂漂明月避人應此夜

烈風欺客更崇朝須知木屐平生著敢負皮冠舊日招
終勝李侯蹲馬背披蓑兀兀路遙遙

赴飲後夜坐對月復次韻

誰從天上作飛橋萬里端愁月浪漂一雨步來非卜夜
五更起坐不論朝水浮北巷深宜揭人隔西河近可招
後會共期秋半勝三旬屈指尚嫌遙

次韻朱天昭戒飲

早覺平生一事非枯喉涓滴到應微舊傳丙吉車茵汚

今見陳遵井轄稀三爵不妨從監史百壺真念隔庭幃
却愁孤館當寒夜禦冷憑誰製寢衣

次韻濟之謝送決明

畦間香霧正氤氳童子清晨荷鋤勤不惜離披垂翠羽
端愁搖動落黃雲藥名早得宣公註書帶休從鄭老分
病目向來俱有賴涼風吹汝莫紛紛

次韻時暘對雨喜晴二首

颯颯復霏霏清晨坐掩扉短籬垂豆角破壁上苔衣潤

覺琴聲緩涼驚酒力微客樓詩句滿未許沈郎肥

斷虹連返照向晚喜新晴遠市浮埃盡長溝積水清歌謠童子事刈穫野人情身在幽燕地無勞賦北征

送原已赴南京院判

晨趨入禁闈夜夢遊鄉闕屢見高堂人宛然兩眉彎憂來心如割歸計何其難終感聖恩渥不為臣情慳南都許便養簡任非投閒十年積憂懷一朝變歡顏而我復助喜安能復留攀初冬入吳境遠見陽華山舟中坐念

之豈亦夢寐間里巷爭歎息樂哉此南還

題啟南寫游虎丘圖

啟南初游靈巖遇雨明日既霖乃與海虞周景新游

虎丘因寫此圖并有詩記其事李貞伯云是日亦在陽山遇雨而歸陳永之謂雨霽日獨以事在陽抱山恨不能與啟南同樂也

皆有詩題其上景新寄予和之

雲巖不減靈巖好

虎丘又名雲巖

昨者胡為涉行潦千人石上

兩青鞚日出深林歌杲杲一時取樂能償勞水西山北
爭探討澗泉漱齒心亦清石壁題名手親埽西去陽山
十里遙冒雨有人歸不早明朝見話入雲巖扼擊將鬚

空懊惱好山不趁晴時遊此事已差何足道安知猶有
獨游人隔水相望在陽抱何處移來此畫圖我方起觀
俄絕倒詩情畫意各有在歲月依然仍可考蟲雞得失
不須爭泡影死生難自保

永之
己亥

再到京華住六年匏翁

頭顱欲全皓江南歸計有時成次第山行非草草卧游
且把畫圖開鶴澗松菴亦天造翻嫌二客不能從回望

周郎與東老

送張宗茂道紀南還

身隱吳門五十年玉京來往只翛然東華塵土霞裳外
北斗光芒寶劍前猶喜山林通雨露亦知官府足神仙
飈車又逐天風轉俯視千艘滯海壠

賦酒榼慶周菊處七十

無稜非觚有蓋如甕重或可以挈空不可以送是名曰
榼人所常用維榼之腹容酒百斛維榼之口出酒千斗
酒旨且多洋洋如河汝不化烏有我肯游無何飲之既
醉拍手歌酒數行歌未已笑鶴夷老無齒一生只呷三

江水不如吾常隱吳市閒與主人較年紀賀客上堂連
坐滿榻凭被藥囊賦此酒榼

送張兼素出知施宗州

歲暮移家赴遠州南行誰復為身謀一章之死無他悔
六詔平生亦勝游科甲翻令吾輩重史編應向古人求
都門持此聊相贈不惜寒風透敝裘

分題豐樂亭送文宗儒太僕

何處亭成樂歲豐瑯琊山在亂雲中西南林壑誇尤美

六一文詞信獨工，幽谷泉鳴琴操古。
石屏路轉酒船通，幸當歸馬滁陽日。
此地來游興不空。

送原輝南還

九月二日

清秋欲盡向南旋，別淚何堪重。
泣然吾已行年當五十，汝今歸路又三千。
亦知禁酒勝良藥，好為修書附便船。
舊業東城勞葺理，相期歲晚在園田。

原輝行後晚坐有懷

東望秋雲壓枕樓，晚來水宿定通州。
却愁細雨行裝濕。

還恨深溝送騎留臨別題詩偏覺嬾坐來呼酒不忘憂
惟應後夜生新月兩地悠悠照白頭

冬至謁陵八首

出土城

馬上衝寒出北門豁然平曠識乾坤地連周圍民猶小
天作燕山勢獨尊看月未忘黃土寺

往歲嘗宿寺中

披煙仍見

白浮村百官令節長來此籩豆如流總駿奔

度沙河

橋下流澌玉一灣六年重此照衰顏
疎林小店行厨到落日平原獵騎還
韋杜南連多白草居庸北距盡蒼山
天寒喜報王師轉驛路無塵羽檄閒

望昌平

脫轡能凌千丈岡解裘還耐北風涼
迢迢古轍餘秋水漠漠平疇又早霜
日隱峰巒天易暝樹連城郭路何長
孤雲飛處梁公廟猶似當時望太行

入昌平學舍

繞簷蒼翠數峰齊倦坐空堂意已躋高處川原渾歷歷
晡時風日稍淒淒行來假館先思睡詩就還家各有齋
苜蓿滿盤供飯足坡翁休愛搗香薑

題劉諫議祠

凜然毛髮萬言危歎息名賢遠莫追甘露翻成他日變
清流寧受北司嗤古人為鑑無如子後輩登科又屬誰
深夜高眠頻夢見孤峰殘月照新祠

門傍高槐向晚開忠魂長繞故鄉來諸生入學供蘋藻

使者停車治草萊展卷不平新史贊贈官空繫後人哀
千年遺恨應難盡誰念唐家有禍胎

入西陵

句裏青山笑復來畫屏真愛四圍開南循古路凡千折

西上高陵第一回

前此陪祀俱東陵

賦雪不勞重授簡書靈還

擬更登臺天潢亂躡支機石漫說昆明有劫灰

出昌平

晴旭熏人屬仲冬
荔簷誰識暖如烘
冰花細結重溪石

天籟遙傳萬壑松此日清酬除酒禁諸公太瘦帶詩容
來春裏茗應非晚最愛池泉歛九龍

為白郎中題荷花鵝圖

前朝畫學人如市不獨丹青競山水點朱塗粉擅寫生
花鳥紛紛總良史趙昌名與黃筌齊後來更稱崔子西
御府收藏三百軸未數溪鷗兼野雞丈鯢如冰筆如刷
似向崔家傳妙訣晴窓信手恣臨模水面鵝成亦精絕
羣魚出游意不閑一躍欲過疎柳灣翠荇蕩搖金掌底

雪毛灑落清波間晚涼莫把荷花摘回首驚猜還歛蹟
紅衣翠蓋錦雲稠此物為爾增顏色戶曹何從購得來
公退閉門時展開城南矮屋撐欲破家人一笑皆云咍
世間妙筆真難致持去莫教成故事試看書罷便籠回
只換義之五千字想公聞此當撚鬚秋風高興非尊鱸
養鵝老向江南住須是結茆臨渴湖

家藏集卷十二

卷十二



家藏集卷十二



總校官庶吉士臣侍朝

校對官主事臣張培

謄錄監生臣阮鍾環

欽定四庫全書會要

集部

家藏集卷十三至七



詳校官候補通政司經歷臣卯祚熾

欽定四庫全書

薈要卷一萬六千七百四十二

集部

家藏集卷十三

明 吳寬 摸

詩四十九首

乙丑元旦星變下詔求言二首

黃繖忽高張御墨開來祇數行從此諫官閒不得
案頭多製上書囊

詔旨分明白近可聽千官拜舞出形庭定從新歲多新政
却認妖星是瑞星

次韻施煥伯自製菜燈見送

龍從翠玉巧相連
疑送春盤入夜筵
園子看來猶恍若
市人攜過已喧然
肯將根柢埋泥土
未許光華照木天
贊有儒家風味在
買油聊費幾青錢

次韻啓南寫贈施煥伯范莊梓樹圖

行人牆下摩挲處
重是范公親手培
此日載將嘉樹賦
清風長傍義莊來
空尋蟻穴難成夢
免製犧尊豈不材
須信畫家原有意
展圖如對北山菜

分題蔣山送屠寺丞

方山在其南破山在其北中維鬱然高失却兩山色昔人云龍蟠信矣甚奇特神靈樂幽棲後世姓初易其陽築壇塲高帝始建國是時昭瑞應香霧俄四塞終然作陵園萬古奠南極至今五色雲變化在頃刻迢迢太平堤高出如聳脊行人睇層峯勢壓厚地側陟官喜南行拭目此親覲棘寺柱笏時公餘幸間隙丞其不負予終朝翠千尺

題墨竹贈邵楚雄行

柳州刺史詩猶在種柳何如種竹清便向滇南長孫子
郡人須繫使君名

二月晦日濟之邀看桃花四首

風將花信報來真不見花開只見塵却愛君家紅雨樹
小園只合號藏春

花氣歎人暖欲熏不須庭下舞紅裙諸公好盡杯中物
春色三分已二分

夕陽持酒酌花魂
新柳疎疎總映門
漸有狂風吹綠暗
已無明月上黃昏

兩株濃淡喜齊開
勾引詩人共看來
縱使墮前都落盡
幸無流水只青苔

追和啓南癸卯元夕後過施煥伯飲

天上星河隔一簾
夜寒詩骨避重簷
大牀坐久頭相觸
短紙題多手自粘
佳節已過燈火在
當年合向畫圖添
魚行橋下平生路
未老同游不待占

送仰給事進卿赴四川僉事

石城風月共襟期不負高名舊所推給舍官銜新改日
朝廷言路大開時西郊屢望雲行密東郡爭傳水漲遲
秋到扁舟三峽穩想應甘雨逐分司

分題圮橋送張公實叅議

行經下邳城試訪留侯事遺蹟今何存臨流漫相指侯
也本韓人天其畀劉氏能擊沙中推願取圮下履何必
魁梧人中心始知恥舉足直受之匍匐更前跪欲為帝

者師寧被老人使嗟當嬴秦時虐燄到經史兵書尤所
禁搜索偏焚毀一編出袖中依然先秦字乃知老人愚
遠勝始皇智黃石聊託名老人亦人耳避世能全身同
時類黃綺維古多斯人過客勿疑此去之千年餘為侯
究終始始見滄海君終從赤松子

賓之學士以母病寬以弟喪俱在告敬蒙東宮
賜問賓之有詩紀事謹次韻

仙蹤每恨失同堂

寬初與賓之同班侍講後陞官始分

賜問深慚及右坊

班近前星仍遞直語溫他日尚無忘薰風又喜萱花茂
苦雨偏傷棣萼芳孤抱幽憂增感激晚來詩句為攜將

閔亡友陳起東詩墨

寥落江山寄一官惡懷中歲反多端猶瞻壽域遙持酒
豈料書帷已蓋棺坐上威儀真簡率句中風韻少酸寒
晴窗遺墨斑斑在淚灑瑤箋不忍看

輓鍾同御史

同景泰間以諫復東宮而死後贈大理丞

屹立丹墀犯逆鱗臺端風采一時新豸冠不倩傍人正

螭墨能將大計陳試使剖心應為國亦知誠口定全身
周君已死宗元逝墓碣終當表直臣

為楊應寧題夏太卿墨竹

舍人好畫誰與儔子美詩裏之劉侯鳳池退食多清暇
每抱縑楮從人求昨者開筵宴賓客四壁彷彿橫滄洲
酒酣指點到修竹數竿倒拂湘江秋清風翛翛刷翠羽
孤鳳欲下中堂游乃知夏卿妙筆墨奇態縱橫纔頃刻
歛然令我走避之仰面分明墮崖石紛紛真贗不可知

我意是竹皆堪詩試看北地苦難得此種數尺青垂垂
舍人好畫兼好奇明日南行過九疑扁舟夜靜月初出
想對楚人歌竹枝

送應寧雲南訪族

曲水當年翠幙新看君曾探杏花春愧無文贈張童子
喜有詩傳賈舍人洛下未通黃犬信滇南不祀碧雞神
卜居京口謀如定晚歲扁舟尚可親

秋享致齋呈同館諸公

紫禁門深早散朝
步歸齋閣坐寥寥
日高宿霧渾如撲
秋至涼風不待招
河上圉人來浴馬
樹邊童子去承蜩
詩仙只在爐烟底
繙盡晴窗白雪謠

又懷翰林諸公

古擣當戶翠陰浮
畏暑時時候簷收
人遠端如隔千里
日長何止度三秋
焚香合送清泉餅
酌酒休誇白玉舟
賴有大牀便午睡
只將幽夢繞瀛洲

答諸公見和

詩筒相送少沈浮入手雲箋次第收苑鳥亂歸初對晚
井梧將落又驚秋廟垣馳過天闊馬齋閣橫如野渡舟
憂抱無緣從祀事高丘南望是長洲

次韻程克勤抱病齋宿

嬾著朝衣侍禁門非關好睡只昏昏吏歸別院雞聲起
客去當階馬跡存展卷書魚常自拂倚牀壁虱未堪捫
知君痛定還思痛便腹空留百壯痕

又次韻夜坐

此夜金莖浥露涼誰家玉琯弄清商河流屈曲東溟近
星彩闌干北斗長法駕出宮千騎整廟庭陳俎萬松香
詩人抱病渾無寐欲獻豳風七月章

送儲考功靜夫

獨赴南都第一曹癯然風骨舊儒袍海鄉人物前朝盛
春榜聲名此日高粉署品評多有暇紫宸趨謁未勝勞
平生為忝斯文契雲路難留自羽毛

次韻胡彥超致仕留別

昔人早已歎賢勞十載何堪第六曹忽報兩涯秋水盛
回看千里白雲高遠途重負歸方釋巧宦爭馳戰敢鑿
為想東陽名酒熟和陶詩就合風騷

送沈良臣知歸德州

吳下傳經久得師名高黃榜副深期進身自惜凡三揖
出守于今又一麾親老定儲迎養祿官廉須立去思碑
連科佳話鄉人紀三沈賢名欲共馳戊戌科沈元知深
州辛丑科沈林知

晉州甲辰科良臣

俱長洲人同姓

秋日園居對雨

但聞人悲秋未聞人悲夏所以涼風生不如暑雨瀉何
況風雨交蕭蕭自深夜朝來御祫衣寒粟稟生膀淒然
園林間物色已可訝兩榆本朽材牽牛故憑藉引蔓何
其長見汝易凋謝決明顏色鮮獨立出其下籬落幸無
求疎枝正相亞

晚晴

閱書短窗下陡覺雙眼明不知荒園中晚來雨初晴西

墻閣夕照晴光射東生海天一何高崛起虹蜺橫須臾
斂去之天巧聊戲呈憶昨延二子

玉汝原已劇談見鄉情憂

懷為少散非藉宿酒清却愁雨既甚飄風復相傾安能
更致之共此林下行籬落滿秋意菊枝已含英我自比
陶潛人誰作王弘聊申再三約預訂重九盟

為寧縣令蕭光甫題墨梅

老榦彎崎新榦直總是昆吾鑽鍊色枝頭忽被北風吹
迸出疎花成戲劇薄如蟬翼細蝶鬚敢與臘雪偏相敵

雪也無香復易消阻山背水俱無策花神冷笑不言功
月下翛翛倚蒼壁狂游不到綺陌間小隱時當野橋側
平生高韻有誰知此種奇姿何處得補之已逝叔雅亡
人間久矣無清蹟詩人未補白華詩畫家重倒金壺墨
悠悠此意我所諳欲向蕭侯聊比德試看寧縣九年官
篋裏只餘花的的士林傳玩等甘棠黃鶴樓中莫吹笛

送巫克莊知孟縣

霜落都門重此行長材聊復慰饑氓定期赤地連村熟

試看黃河繞郭清春院種花前令事秋闈攀桂昔年情
中州不與長安隔賸有人來達政聲

送袁道官還南京朝天宮

九曲門深古洞天治城山色尚依然重開紫府如三島
一著黃冠也十年聊逐斯人游世路更從何處領真仙
數間祠屋偏鄰近好拂丹青護晉賢

送道士羅永澄還住福濟觀

獨鶴翩翩下玉京霜空無際趁秋晴久為玄學慚方士

親向仙班謁上卿水岸曲通三島僻夜壇頻禮七星明
榴皮繞壁題詩滿歸與回仙又慶生

送鄭仕信知大猶縣兼問訊王允達

州縣勞人歎獨賢秋風捩舵又南旋浦江喬木渾無恙
庾嶺梅花却有緣豈待新遷隨例得更將遺愛與人傳
青巖山下經過地為謝閑居鳳治仙

次韻侍郎王公還南京留別二首

留務經心白髮新從來學海更知津入朝未曳尚書履

直閣曾垂學士紳天上誥詞瞻湛露郢中詩句和陽春
後生共存攀留意不獨詞林滿故人

秋水浮來畫舫新南歸仍喜渡天津未從江左誇王導
如向朝端見李紳黃菊又逢燕地晚青山偏愛秣陵春
陞辭却枉重瞳顧應識青宮舊學人

送王抑夫赴官陳留

南都聽罷鹿鳴歌坐覺悠悠歲月過久矣長才淹上國
壯哉名縣隔南河鄭莊此去須行水趙過從來善種禾

能使流移皆復業看君聲譽數車多

送林朝信還廣西分韻得歲字

玉河凍不流曉結冰花細客館傍東堤三旬喜留滯捧
表被光華開筵接親契抵任尚遲遲吳門度新歲

題啓南畫

閉戶蕭然亂雪中已無賓客晚堂空槁梧獨據忘為我
老筆能揮愛此公却構石闌臨絕澗似聞茆屋卷秋風
十年別却西莊路歲暮相思白髮同

題元顧仲瑛玉山佳處卷後

卷亡已久仲瑛之

孫御醫始得之上

有陳基

記文

神龍飛度石頭城一日吳門失顧榮池上已亡金粟影

仲瑛臨
池軒名

邑中不改玉山名故人斷簡重相授內史高文

孰與評

基仕偽吳
為內史

栩栩百年真夢境濛涒還見舊題銘

仲瑛後遷中都家于莊子

觀魚臺傍題其屋曰夢蝶

王汝席上詠物

擣

來從馬上郎猶帶洞庭霜
霧騰金筭清冰貯赤囊曾
聞書後寫宜向醉中嘗愛此非陳紫能留客滿堂

新米飯

繞厨香飯軟初成吳下長腰舊有名何事今年荒旱甚
貢餘猶自飽新粳

玉箸魚

天寒鑿破水晶宮貯向銀盤望若空對案莫教容易食
層冰指落念漁翁

濟之席上詠物

風菱

長腰如磬折入手訝中空歲晚懷佳味吾曾白傅同

銀杏

洞庭霜落後不數橘能黃把玩還長笑因懷阮籍狂

冬筍

錦裯秋後脫玉趾雪中過大嚼何須肉平生愛老坡

贈顧正科鏞還中都

仲瑛五世孫

清晨持刺扣門投有客來從淮水頭吳下故家依二曲
沛中遺調習三侯閱人詩畫才情麗傳世衣冠仕路優
欲盡尊前鄉土話雪晴歸騎恨難留

悼李御史士常

紛紛餓莩蔽河津不卹微軀欲徧巡驛騎書來俄即世
輶車棺在已周身道塗涕淚從諸弟文字交游失此人
知是平生無別好只將詩句哭元賓

謝濟之送銀杏

錯落朱提數百枚洞庭秋色滿盤堆霜餘亂摘連柑子
雪裏同煨有芋魁不用盛囊書復寫料非鑽核意無猜
却愁佳惠終難繼乞與山中幾樹栽

寒夜熟寐右臂偶加湯具成瘡痛甚不能舉移
因讀邵康節臂痛吟戲次其韻聊以遣悶耳

春滿寒衾擁瘦軀無端一痛折肱如為文曾效前修撰
少時曾作
湯媪傳作字俄遷左祕書禮謝擎拳情可恕醫因掣

肘病難除坐來歲暮多憂色此苦誰非自取歟

卷十三

家藏集卷十三